

湖南文徵

湖南文徵卷三十七

湖湘後學集編

傳上

明

朱惟善先生傳

朱英

先生諱惟善字復初自幼爲家塾師淑人於善故稱惟善先生先生自幼明敏嗜學書法歐王體兼承庭訓之嚴授春秋經於尊王抑霸褒善貶惡大義講求切到洪熙閒族人欲藉先生爲塾師請命於通判甫諭之曰童蒙良心未喪天理純全希聖不賢胥基於此發蒙之道不可不慎其他聲音句讀揖讓進退與夫詩書六藝之文皆師所係汝慎旃哉毋誤後進先生旣受命

入塾恭執師道儀度肅然序以長幼諭以學規教讀之聲聽無
暇時或詩或對命題改彙手不停批習楷書者點畫必歸於正
體暇則嫻以灑埽應對之儀授以陰陽算卜之術而入孝出弟
謹言慎行又時時深切著明焉故人多所造就雖愚亦善書知
字吟詠對偶至束修厚薄非所計也由是願遊於門下者日益
眾一時青衿濟濟藹乎禮讓之風先生持躬甚嚴不苟言笑雖
甚暑出入必整衣冠學者見卽凜凜如授業時先生英之再從
兄也英自幼失怙賴先生之考通判甫維持而受先生之教誨
亦有年正統甲子夏英偕先生姪琛應武昌鄉試先生喜謂英
曰賓興盛事也吾願同往觀之卽買舟偕行至長沙先生遽疾

舟泊洞庭之黃陵廟先生忽疾篤執英輩手囑之曰吾欲來觀
盛事爲汝輩賀耳不幸至此汝當歸葬吾於先人之兆死亦瞑
目言已卒於舟時七月十七也春秋四十有三因橐葬赴試畢
琛先歸理葬事八月撤棘英與選列迨歸而先生已葬家山矣
先生配九塘橋李氏繼配孔厚坊何氏子男四而殤其二守信
守文循循雅飭克遵父訓守信嘗教讀鄉校不幸亦早世嗚呼
先生爲人德行素裕學有源委善成於己而淑諸人人亦思慕
之無已所作雖集未傳其藏於世家而膾炙人口者皆本乎性
情之正而藹乎盛唐之音惜英不肖不能推先生之教於有爲
然其本源所以培養乎昔時者自當始終如一勉圖所以無負

於先生。蓋知先生者英也。先生雖不偶於時。而其所存所施實有不可泯者。一或泯焉。英之罪也。是用謹述其概而列爲傳云。

元洲拙逸傳

黎 澹

金溪西北有元洲。元洲之水發源寶山爲元水。沃土彌望凡十餘里。或曰是水之流曲折蜿蜒狀若元字也。故名是洲爲元洲。或曰是洲也。閬深元遠。居之可養元德。名取其勝也。故謂之元洲。鄉之逸民有將家屬農於斯者。愛其風土質樸。與乃拙性宜。且安土旣久。因自號曰元洲拙逸。拙逸初來時。家猶貧躬墾洲中。給祖母二親之養。依場圃結草菴號稼菴。歷數歲而力始裕。於是逐良賈。沂江漢趨秣陵。旁午於吳越之區。以遷有無。晚而來歸家。甚豐。世故益熟。乃更今號。蓋括囊肥遁。不復嬰名利云。拙逸於書無不讀。尤深於四書。操觚染翰。得晉人筆法。生事愛

敬死事哀戚。仁親之道化成一家。敦厚質直簡默少華采。不能與世俗俯仰取懽悅。然人讎之亦不復盜侵之亦不較。卒皆感而輸誠。衣服惟布素。不事綺縠。飲食惟蔬水。不愛肴饍。行動惟草屨竹筇。不樂騎從。家多穀粟。正統景泰閒。兩值歲歉。散以賙貧。不責其償。生子二。皆教之文學。長瓊。天順初元。遂賜進士及第。拜官翰林編修。又三年秩滿。得推恩拙逸。如子官階文林郎。然又屢書來諭。拳拳惟清慎忠孝是勉。聲華美麗不言也。嘗語人曰。古之逸民。其上不降志辱身。其次言行中節。茲吾幸生太平無事之時。無不滿意者焉。敢復爲高尙如彼哉。素性本拙。當適吾性而已耳。然而吾游是洲數十年來。嘗見善游者溺矣。善

騎者墮矣。又嘗見漆有用而割膏以明白煎矣。吾養吾拙以生。吾生拙以養心。收而無邪思也。拙以養身。約而無違理也。拙以養行。慎而無後艱也。拙以養言。訥而無羞辱也。由是而之焉。雖不巧何悔哉。故雖寡交。人自樂從。或飲之酒。輒盡醉。醉則自歌曰。皦皦易污。澆澆易缺。安命樂天。何如我拙。又歌曰。眾人紛紛而我醇醇。一觴一咏。聊全吾真。此可識其生平大概矣。壽六十而卒。拙逸姓徐。名文字貫道。其先有柏軒翁。爲府郡博。實始遷祖。而高祖松坡先生。至厥考萬竹翁。凡五世。俱尙隱德云。太史公曰。古者檜巢而居。營穴而處。人事樸略。然其俗熙熙皞皞。後世雕飾紛華。文治日明。其俗反澆薄何哉。豈非其人日趨巧而

不知返拙耶。商鞅巧於法。蘇秦巧於辨。李斯巧於術。宏羊巧於利。然卒以自戕。拙逸一隱者。顧乃流慶餘裔。身被顯榮。且獲壽考而終。其爲人賢不肖何如。杜子曰。用拙存吾道。周子曰。天下拙。刑政徹。拙逸可以共適此矣。

太保朱恭簡公行實錄

黎澍

公諱英字時傑其先爲廣州節度避難自曲江徙家郴之桂陽故世爲桂陽望族聞祖德甫鄉稱長者高祖諱一詠號吟叟有詩名曾大父諱希尹字如鐸號竹園皆隱居不仕大父諱攀麒字賢瑞原任廣西陽朔縣主簿父諱思諫字良弼俱贈資政大夫正治上卿都察院右都御史祖妣宋氏鄧氏妣胡氏皆贈夫人公生而穎秀早孤暨弟惟慶皆胡夫人鞠比長遣公爲邑庠弟子員每歸必親戒厲公感服慈訓自奮不怠始治書改詩又改易故雖以易爲專經而猶事詩書大義正統甲子領鄉薦乙丑第進士時族兄克寬亦在選列先是桂陽科目久乏至公弟

兄齊名人以爲難試政夏官大司馬鄭忠肅公特加器重丁卯
授浙江道監察御史己巳朝廷以閩浙寇起嘗釀自銀冶遣公
等御史十三員同中使分守州縣預計撫綏比至大軍尙駐金
華公欲趨處州守鎮危之遣人遮畱不聽乃取道慶元下榜諭
賊以禍福招出被擄老弱又計獲賊首周明松若干人頃之中
使竇某者報曰黑面大王領眾三萬欲劫周明松等以復讐議
欲偕走公持不可徐使人覘之而令所司屍明松等於市賊果
不至公益練民兵據險隘募壯勇爲守戰計會景泰改元召回
父老泣畱皆慰遣之回朝論處中便宜五事詔下諸司議行自
是畱掌邊事外戚都督汪全縱家人侵民產時林莊敏公爲給

事中公諷莊敏公交章劾之上雖貸全仍奪其產以給民中官善增姚廣恃寵暴橫又與莊敏公等劾之同列有縮首改容不與同署者上亦竟以二人下錦衣獄浙江都指揮張勇王越罪當謫戍假賂夤緣終拒不少貸壬申八月召多官入內有易儲之議公與御史沈義同林莊敏公等對用事大臣歷論不可者再四公知事已無及與莊敏公相向泣下而退明日詔風憲官被訐者無論結罪與否俱令吏部補外蓋大臣嘗欲奪鄉民田惡御史周鑑王豪不附己意令人誣奏勘覈未報至是欲竝逐之公上章極論其非便上納之竝敕諸司詳看詔格有疑礙者議奏故王周得免而用事者忌公亦深是冬遂有廣東布政司

右參議之命。道便歸省。胡夫人見公歸橐蕭然。止有上賜銀十兩。喜曰。兒居官正宜如此。隨趨赴任。舊俗上司下車。奸民避役。假額外隸從身以賄免。一受其餌。多至欺賣債事。公至悉遣之。司中事無巨細。由公可否者。眾皆宜之。理問獄。賴以不濫。始與巡撫楊公議。均徭法。限以十歲一役。九休。至於今不廢。校理戎政。停遣。惟當省類總冊。仍式下州縣。使自造。歲裁冗費以萬計。癸酉鄉試。有都指揮于姓者。爲子求舉。要以厚賂。公叱弗許。且誓執事去。取必公。奉詔會錄各屬罪囚。一意伸雪。一日宿雷州分司。夢有人爲換心者。取心照之。白色。點以藥末。赤色。安置如舊而去。驚懼覺疼。以寤。甲戌以後。專理撫治。斗峒賊首。揚通劉

三仔恃險爲亂公屢撫諭不聽始分兵勦平之捷聞賜綵緞寶
鏐又招賊黨鄭初等百餘人將臣皆欲處以軍法公陳辨數四
止誅首惡數人餘悉縱之丙子秋入覲還過南昌時族兄克寬
僉憲江西物故雖不及見而得與殯殮人以爲友愛之驗戊寅
葉文莊公巡撫兩廣一時因革進退多所諏諮冬進萬壽表歸
路遇新淦尹李舟南海尹趙莊給由來會各囊白金爲贐公俱
卻之後二人果以贓敗受贐者俱坐累公獨不及己卯有採珠
之役中官督責甚急公掌司事謂之曰兵乏民貧宜俟巡撫會
議且節其日給費疏乞召還民賴以無擾兩廣常會兵勦賊葉
文莊屬公督察奸弊初參將范信先在會勦大藤峽時以木頭

峒獠賊爲名徑趨廉橫間誣報永泰永平等鄉居民皆爲賊黨誅殺殆盡遺逃徙者數家後稍復還農至是信又欲竝進城等鄉滅之公馳赴其營凡所獲無辜皆審實縱遣之夜夢一男一婦兩黃口詣牀前愀然曰吾無官作主被害一婦又曰吾夫又被擒矣公夢中拊膺諭之比覺持議愈堅明日信欲發兵襲其鄉公止之曰往年永平永泰之冤不可追矣進城實在腹裏耕讀者萬眾惡狀未著奈何戕之信忿不能成功圖公者百計相持月餘會文莊閒使至公具以告請亟班師諸鄉民始脫血刃又有告廣州丰湖堡民作亂者欲盡族之公知其冤力爭以免至今生齒日蕃辛巳湖賊羅劉甯等流劫郡縣屢挫官軍公奉

檄會兵勦滅生俘脇從者皆欲以爲功公曰良民也縱之全活者甚眾軍中獲被擄者數千人公別置一營以處婦女人莫敢犯而各還其家捷聞賜綵緞寶鏹新會有海淤田大姓爭訟不決公籍之以給貧民無田者爭始息遷右參政聞母胡夫人喪還桂陽成化乙酉改任陝西丙戌以後更守延綏甘涼所至繕城堡足糧餉時涼州及西甯官藏被劫所司委罪主者至皆誣伏公訪獲真盜遂明其誣延綏久旱公齋沐躬禱山川雨及旁郡土達滿四寇固原官軍失利大將以上皆獲罪上命項都憲忠往討之檄公總饋餉凡軍中進止必見諏焉未幾賊平亦與賞賚己丑擢福建右布政使時提督市舶中官物故守鎮以所

積分惠諸藩臬公署司事今尙書何公喬新時爲憲副亦署按察司事各以所分籍於官王辰遷陝西左布政使均徭定法凡諸興廢事必皆宜於其俗兩省便之甲午遷都察院右副都御史奉敕巡撫甘肅首陳安邊十事大略欲練兵積糧興屯種柔諸番皆切於時務旣又陳十事如徙居戎簡貢使謹烽堠防奸細等事恆慮所未及後又因星變議陳八事如請衣裘以給墩軍故雖苦寒人免凍斃其餘七事悉切中機宜嘗舉武官分授要任疏賤不遺如王璽劉晟俱爲當時名將乙未奉敕總督兩廣軍務兼理巡撫行之日民遮道泣畱者不絕諸將受舉者或密齎金帛以贐公皆卻之時兩廣賊情不靖將臣每張其勢以